


全邊略記


四下



		九	漢
	二	一	書
	四	六	門
	架	函	類

庫文閣內			
九	九		漢
函	一		書
二	二	一	
架	四	六	類

內閣文庫		
番號	漢	9116
冊數	24	( 8 )
函號	292	136





之危幾於覆沒。當是時，邊將如石亨、許寧輩，雖皆劬  
餘，其平昔才勇操守，猶足繫屬人心。今承平日久，邊  
臣又非時望，安常習故，無所更改。治不忘亂，固如是  
耶。十四年二月，先是虜大入，延綏、神木乘勝掠紫陌  
溝。總兵陳瑛、副總兵朱瑾、太監會敏巡撫王嵩奏報  
不以實，遣給事勘之。下法司治，命保國公暉、朱佩征  
虜將軍印。總五路兵赴榆林禦虜。右都御史史琳督  
之。暉等至紅城子，出塞覘虜所在，潛師河套，擣其巢  
穴。會夜大霧，虜聞礮先遁，毀其廬帳，斬三級而還。擢





大理寺丞陳壽巡撫延綏。時火篩侵犯劇甚。鎮城晝閉。壽兼程赴任。先卹陣亡官軍。隨易諸路將領。與虜戰三勝。虜遂渡河北遁。地方危而復振。開邊耕耘。架梁採牧。不數月。省費二十七萬。時同事者諷壽注子弟姓名戰籍中。當有功賞。壽曰。吾子弟皆不諳弓馬。竟不許。都御史史琳請遣譯字作番文。諭虜酋火篩而兵科屈伸駁之曰。曉諭者威力能制其死命乎。憑筆舌以屈之乎。假令陽爲順服。以貢疑我。而時出寇。索將士之氣。何以處之。恐我番文適墮彼計。居何虜。

寇延綏。科部劾奏史琳庸鄙貪黷。章下所司。十月大理寺寺丞劉憲。太僕寺少卿王質。既承命分往延綏。寧夏。陝西。甘涼四鎮。召募土兵。兵部請給四鎮官銀二十萬兩。及太僕馬價四萬兩。分送各巡撫收貯支用。所募兵不限漢土番夷。人給銀伍兩。冊內三丁。選一者。人給三兩。各與糧賞。仍免舍餘一丁。助之。見任百戶副千戶能募兵百人。正千戶募兵五十人。指揮僉事指揮同知募二百人者。各陞一級。至指揮使而止。都指揮僉事及同知募二百五十人。亦各陞一。



級至都指揮使而止。爲事立功戴罪革職閑住者能募百人。悉與復職除罪。卽各統其所募之兵。從之。朱暉等班師。兵科劾奏。朱暉史琳所獲虜首止于三級。而冒稱一萬。前後調餉一百六十餘萬。易一胡人無名之首。假使斬一虜酋如火篩者。恐竭天下之財。不足以供其耗。坐失事機。宜彰天討。上命已之。十五年。總制尚書秦紘奏。京師天下根本。邊將手握重兵。每遇寇來。請援于內。豈強幹弱枝之策。此後京營不宜輕發。其臨鞏之往。備甘涼甘涼之往。備臨鞏俱宜。

各還本處。推知兵宿將領之人。以戍爲家。而樂於趨役。軍以將爲膽。而自奮戰心。兵部看詳。爲可。史琳陳邊務十三。其曰。取回守備內臣。以革占役軍人之弊。部謂其言懇切可從。上曰。守備內臣。卿等再議。總制秦紘上方略曰。平涼北四百餘里。舊有豫望城。固靖北三百餘里。舊有石峽口。及雙峰臺城。賊寇總路。最宜設備。欲將三處修防。東與環慶。北與韋州。烽火傳應。第一阨也。進而稍南。內有野處。軍民已爲隨山。修堡險固可依。又有西安州。鎮戎所。海刺都。打刺赤。



黑水口乾鹽池。撒都城。犬牙參錯。第二阨也。又進而南。則固原靖虜平難堡。一條城。東山城。白楊城。第三阨也。文進而益南。則火籠溝。虎山溝。金佛峽。麻張溝。海子口。皆山蹊。用力不多。各石甃爲墻。仍留門。以便出哨。其門俱有鐵裹。墻上各建營房。一夫守險。百人難過。第四阨也。如此則賊無入路。就令能入。跋涉。疲各堡屯兵。隨處設險。我欲夾攻者易。賊欲分寇者難。似爲得策。十六年。秦紘條上固原之議。先是成化九年。主事李炯然。建論固原設總兵而罷。至是給事

楊禱。請令固原自爲一鎮。下紘措置之。紘自詣固原。見其火煙蕭條。城郭湫隘。于是增而展之。奏以小鹽池立爲定價。不匝月。商旅日集。官徵其直。歲可得四五萬金。又見固原之北。豫望城。騾子川。獅子川。石峽口。韋州無慮數十萬頃。野曠無棲。鞠爲荒草。旅人露宿。遇寇多陷。欲于二十里間。增築小堡。堡周四十丈。工二百人。募兵墾田。而寧夏巡撫劉憲。執言不可。役待敵之兵。紘更端以曉之。謂增墻濬溝。當西安人夫八萬。修九百里。比之役萬人。修三百里。孰遠孰近。憲



乃屈從紘裁之。十七年秦紘奏。臣嘗督修諸邊城堡。一萬四千餘處。邊塹六千四百餘里。于靖虜金湯。及打狼川諸要地。設隘造車。給銳繪圖。以上指揮陳善。謀勇是用。乞擢委巡墻。上獎之以勅。正德九年虜入花池。參將尹清追之中流。矢死。總制鄧璋奏。修清平大澗。新安草甸。諸墻以衛之。秋虜寇隴州。亦卜刺寇岷洮。命都督張洪充總兵官。領京兵五百人。洪請調宣三千。遼二千。釋遼繫臣之勇者。馬驤等三十人。給事言。陝兵可十萬已足用。如洪往返徵取。動以旬。

月。遠赴數千里。虜以過河矣。巡按常在奏。虜連營七十餘里。自春徂秋。城堡爲空。皆將帥不得其人所致。乞罷總兵潘浩。都御史邊憲。太監張昭。廖堂。都督侯助。侍郎馮清等。得旨。已有處分。延綏都御史姚鏞言。鎮守太監總參等官。有犯沒占科歛諸事者。宜照文職犯贓例。奏帶撥置之人。發邊遣戍。斯言也。救敝補偏之昌言也。御史奉命閱視延綏寧夏各三路營堡。城所原設官軍。凡十萬九千一百四十一人。存者七萬七千一百五十四人。馬四萬五千六百八匹。存



者二萬七千八百九十二匹。固原延安綏德慶陽平涼并安東中衛護衛及各城堡原設官軍一萬八千九百三十四匹。存者六千九百六十匹。西安左前後并右護衛漢中寧羗二衛鳳翔府金州沔縣三千戶所并鄜州商洛防守官軍凡三萬五千七百九十八人。存者二萬三千四百二十六人。馬一千二百三十三匹。存者一千一百三十三匹。西安慶陽延安平涼鳳翔漢中六府并所屬州縣原設民壯機兵兵壯凡三萬七千一百九十七人。存而可操者萬五千九百九十

八人。城堡墩臺亦多頽壞。軍器廢缺。而存者又不免苟且具數。因劾諸守臣廢弛之罪。嘉靖六年套虜數萬踏冰過河。尚書王憲總兵杭雄鄭卿敗之于青羊嶺。凡斬級三百有奇。七年大學士楊言臣在陝最久。竊見糧儲匱乏。士有饑色。馬多瘦骨。內地所派既不足。外供帑或間發。不過就地之所產。糴于廩中。而開種不廣。別無輦致。穀價騰踴。日異月殊。所司往以價給軍。令之自市。督併日嚴。怨聲載道。夫派糴既有弊。惟召商便焉。凡開中鹽引。務令商納本色。如遇



全邊明言  
豐歲折放之。亦當稍優其直。而不苛其收。則應者衆矣。本土所需。非與屯不可。廣屯非補丁不可。其故何也。正軍充伍。餘丁撥屯例也。但其中有有軍無餘者。有有軍餘而無力不能布種者。故屯地多侵沒于將領豪右之家。以致屯軍終歲賠糧。有貧丁以田假佃于人者。有田隔遠。磽瘠無人願假。不得已終歲傭身以輸糧而不足者。管屯之官。至計十歲以下幼男。報充屯丁。參兩朋合。謂之擡糧屯事。至此邊人之困。尚忍言哉。軍士三守城七屯田例也。今各征操之外有。

乘墩守堡伏塘等役。卽守城且苦乏矣。其何有于屯。宜令清軍官。查理各衛軍戶。應解者俱選解。健丁仍加帶軍餘一人。戶大族衆者二人。與俱詣邊。以補屯卒。使來則有親屬以爲侶。至則有田業以爲家。庶生理相依而逃亡者鮮矣。不然亦可做古募兵實塞之意。召募隴右關西之民。以屯塞下。授地之外。任其開墾。俟三稔。乃徵其租。一切徭役皆復之。又考先年屯政。修舉之時。牛具種子皆爲官物。年老者選代者。例以其具還官。今盡廢矣。宜做其法。至于屯地隱沒者。



全邊略言  
令人首告退吐而不追其往可也。徒以清查催納爲務而經理無方也。奚益工科陸粲言自東勝棄而靈州爲虜衝。正德初一清楊建築墻之議僅四十里而止。言者謂風沙太勁版鍾難成。然前此竝立如故則謬妄可知。臣嘗詢訪西人謂有五利焉。混高視下以逸待勞。士有全力以制虜。敝一也。畜牧在野不畏驅掠。歲益蕃孳。邊人富寔。二也。邊境方乏馬。墻成則步卒可守。量省騎兵。減芻秣之費。三也。靈州大小鹽池。近以虜警頻仍。坐失歲課。墻城則撈採以時。商販無

阻課額充足。軍用益饒。四也。廣開屯田。安意耕獲。漸省轉輸。寬內郡之力。五也。上從其議。下總制王憲經略之。仍專遣僉都御史王廷相往同區畫。九年總制尚書王瓊奏。今秋防如各歸協守。則總制宜罷。如屬臣總制。須如去年大調。擺邊務足三萬人。七八月之餉。然後可。部議如去秋所防。瓊又上邊事。言涼州三百人。番守洮州者。宜還之本衛。而裁洮岷參將之冗。遊擊之駐固原者。所選慶陽河州臨洮秦州西安左衛者。共三千。其地去慶陽遠。徵發輒誤。宜改駐西



全邊明言  
安。卽于城內選取爲便。都督之駐固原者。五千餘人。別選安會二縣。臨鞏鳳涼。士達民壯。舍餘以足之。但土達及召募者。與正軍異。乃一槩調發。累矣。正軍爲遊奇。而土壯歸本。所操種爲便。如此。正兵守。應兵禦。此調集兩利之策。從之。十年閏六月。王瓊奏。計度榆林東中二路。大邊六百五十六里。當修者三百十里。二邊六百五十七里。當修者二百四十八里。第二邊乃成化中。余子俊所修。因山爲險。屯田多在其外。大邊弘治中。文貴所修。防護屯田中間。率多平地。築墻

高厚。不過一丈。可壞而入。今當先修大邊。無得徒事補塞。必使岸塹深險。墻垣高厚。計用丁卒萬八千人。乞發帑金十萬。以明年二月興工。部覆請行。而戶部奏延綏事與寧夏不同。其二邊因山爲城。易于戰守。乃大邊沙漠平澇。勢不久長。故余子俊之二邊。迄今尚在。而文貴之大邊。蕩然無存。且陝歲荒。一旦下令。儲糴數十萬。價必翔貴。大役驚疑。前事可鑒。上乃命總制尚書唐龍。親行相視。十一年北虜自延綏求貢。例于成化之于小王子也。無何虜以不得請爲憾。



擁十萬入寇。上怒其驚。命亟議征。十一年五月吏部尚書王瓊上言。臣前議榆林之虜。真以精兵扼之。綏德險阨。調固原三千足矣。當事過計。乃調京營宣大寧固萬八千以赴之。供億浩繁。日費金六千。內地坐困。今虜已退。乞掣回京軍。散遣各路所調募者。專責本鎮。據險防守。既而尚書王憲以瓊疏語侵已。疏言。茲寇甫退。議者卽咎老師費財之無益。而不思其初。本鎮孤懸。無備之可虞。且調兵遣歸。固宜。若募勇敢。不過三千人。曾不足補原伍之缺。臣請留勿還。

上曰。掣兵既有成命。瓊奏亦籌邊慮。不必自分彼此。十四年給事中戚賢勘上陝西事。虜入安會二縣。殺掠最慘。大帥劉文罪最重。第麾下卒僅八千人。而嬰八九萬。方張之虜。尚能兼程冒險。獎督偏裨。所斬獲亦百二十七級。失亡雖多。宜以功贖。其叅將霍璽。孫仁以下。功罪各有差已。又勘延寧二鎮。總兵梁震。王効。始雖不能遏虜於未入。而震乾溝之戰。効舅湖沙湖安定之捷。亦足振揚國威。震懼醜虜。至於靈州之役。効以八百孤軍。而禦萬虜。有奇計。効部斬首實一



百五十八級。震部九十九級。并總制唐龍總兵張鳳  
巡撫于桂張文魁等功。上甄別有差。十五年正月  
唐龍言。先年虜酋吉囊等擁十萬突榆林。臣調兵分  
部。虜屢挫衄。度不能入。乃別遣五萬騎。繇野馬川渡  
河。經入西海。襲破不刺營。收其部落大半。惟卜兒孩  
所領餘衆脫走。此以夷攻夷。中國之利也。經今歲餘  
虜警稍息。十六年。劉天和秦固原爲套虜深衝。前秦  
紘修築邊牆。延袤千里。然虜每大舉。尚不能支。及楊  
一清築白馬城堡而後。東路之寇不至。王瓊等築下

馬房關而後。中路之患得免。惟兩路自徐斌水至黃  
河岸。六百餘里。地勢濶遼。終難保障。今紅寺堡東南  
起徐斌水。至鳴沙州河岸。可二百二十里。總兵任傑  
議於此地。修築新邊一道。遷紅寺堡于邊內。撤舊墩  
軍士使守新邊。舍六百里平漫之地。守百二十里。易  
據之險。又占水泉數十處。斷胡馬飲牧之區。而召軍  
佃種。可省饋餉計無便於此矣。兵科都給事中朱隆  
禧等言。祖宗之時。河套固中國地也。自余子俊修築  
邊牆。不以黃河爲界。而河套爲虜所據。寧夏與山後



全邊明言  
諸夷爲鄰。賀蘭山其界也。自王瓊棄鎮遠關。創爲新邊。而賀蘭山爲虜所據。遂使延寧二鎮。受惠至今。明鑒不遠。人所共惜。傑及天和。敢於妄議。不思新邊既築。舊邊不守。紅寺堡五百里之地。直棄胡中。且使延寧皆在邊外。我退一寸。虜侵一尺。非爲國深長慮也。部亦以爲避危就安。割已資敵。上切責之。十八年。主事許論疏言。成化以前。虜患多在河西。自虜據套以來。而河東三百里之間。更爲敵衝。故窺平固。而犯花馬池。掠環慶。則繇花馬池之東。入靈州。則清水營

一帶。是其徑矣。論者以固原爲堂奧。響水溝至花兒岔。爲二門。花馬池爲三門。今不守門戶。而守堂奧。非計也。臣常籌之。若移總督於花馬池。大建城堡。添設叅遊。分屯重兵於渚水。興武等營。令三百里間。旗幟相望。刁斗相聞。其鐵柱泉等。盡建堡墩。此扼吭先制之計。其議中。寢虜酋吉囊。擁數萬。繇延綏西路。定邊入寇。時諸鎮兵悉分布守邊。虜乘虛攻固原城。分兵四掠。殺戮甚慘。會大雨。浹旬。道澀。虜騎不得騁弓矢。盡膠陝西總兵趙時督兵分道邀之。虜始引旋。至黑



水苑延綏革任總兵周尚文。盡銳攻之。自巳至申。凡三戰。勝負未決。吉囊子號小十王者。驍果而輕。率其勁卒三十餘人。馳衝營中。堅爲我軍所殲。虜衆遂奪氣。歛去。寧夏總兵任傑。副總兵陶希臯。復選銳于鐵柱泉。迎擊之。追奔出塞。斬獲甚衆。是役也。虜以八月二十一日入境。九月十二日始出。初至甚銳。諸將莫敢撓其鋒者。縱橫虜掠。旣而霖潦欲且。壓顧惜輜重。兼易我軍。甚無戰志。總督尚書劉天和以修省。詔旨嚴切。而諸將畏縮。慮重得罪。乃斬不用命指揮使。

牛斗郭卿文。時周尚文已革任。特檄召之。激以忠義。尚文感奮。遂有黑水苑之戰。軍氣乃振。而三鎮斬獲至四百四十餘級。虜所擄獲亦復失亡過半。於是天和以捷聞。上大嘉之。曰。虜歷歲寇邊。猖獗滋熾。天等調度士馬。悉力驅勦。斬將擒王。功幾五百。此捷前所未有。二十二年十月。是歲八月末。虜三萬騎犯延綏。自波羅嚮水堡。進邊深入。及綏德州。延綏遊擊張鵬力戰禦之。虜乃引去。總兵官吳瑛。副總兵蔣存禮。選銳躡之。及于塞外。寧條梁。麾衆急擊。弩銳俱發。適



東路參將周文兵亦至。兩軍夾擊，賊衆大潰，斬首虜百餘級而還。於是巡撫延綏副都御史張聰等以捷聞。時巡按陝西御史殷學亦報虜警，因言賊入內地，且五百里，而諸將擁重兵不聞一戰，請罷聰瑛等，疏方入，捷報隨至，俱下兵部覆稱：延綏遊兵俱調宣大，黠虜方避實擊虛，而我兵能以寡勝衆，可謂奇捷。所據總督尚書楊守禮、巡撫張聰總兵吳瑛俱應奏獎。二十五年，總督張珩曰：延綏西路把都寧塞靖邊鎮靖龍州五堡實延廊之通途，套虜之捷徑，近徵其兵。

西戍定邊非計，宜各留防本堡，而持增步卒五百，以爲定邊守禦之助。仍將延安諸衛清出，見軍蒐簡精銳千人，委一謀勇把總領之，分布四路，沿邊各縣僉選民兵實保障地方急務，宜命大縣率選五百人中，縣三百人，小縣二百人，擇佐貳一官，時加訓練，有警卽令統領防護本處城池，不必調遣。五月，給事中鮑道明、御史曹邦輔議延綏一鎮殘破殊甚，請於賑恤之外，戶絕者仍免其徭，且多發廩帑以足一年之計。本鎮兵弱乞免其戍，宣大而專力自守，且調寧固遊。



兵一枝駐延綏鄰境以備應援。上深以延綏凋殘爲慮。詔戶部亟發兵銀六萬往賑。令總督親詣撫恤。總督曾銑疏陳其狀。方虜之深入也。銑率標兵數千駐塞門。遣中軍官原任叅將李珍統之。出塞直搗虜巢。於馬梁山後斬首百餘級而還。銑復以捷聞。而巡按御史盛唐則言虜深入幾及千里。駐內地且半月。慶陽從來未被虜入。民居甚夥。今且四望斷煙火矣。在我主客兵馬。無論數萬。悉悉潛踪匿跡。踵曩時迎送故套。無敢一與虜遇者。幸陰雨浹旬。泥陷馬滑弓。

膠弦解。又以慶陽山路深峻。虜乃殺偵道者。自引去。不然其禍猶不止此。請寘諸將重刑以懲後之玩敵殃民者。十二月庚子。總督陝西三邊曾銑。巡撫謝蘭張問行等。奏延綏密與套虜爲鄰。自成化間。都御史余子俊修築邊牆。東自黃甫川起。西至定邊營止。延袤千五百餘里。歲久傾頽。餘址間存。不異平地。嘉靖九年。總督尚書王瓊修花馬池邊牆一道。自寧夏橫城接築。至定邊營約三百餘里。而自定邊營至黃甫川一帶。依舊無墻。連年虜入。率繇是道。所當亟爲修



繕第。上廣工浩。勢難責效于朞月。宜分地定工。次第修舉。西起自定邊。而東至龍川堡。計長四百四十餘里。爲西段。乃環慶保安要塞。所當先築。自龍川堡而東。至雙山堡。計長四百九十餘里。爲中段。自雙山堡而東。至黃甫川。計長五百九十餘里。爲東段。歲修一段。期以三年竣事。保障功完全。陝攸賴。銑又上言。河套故朔方地。自漢武遣衛青逐虜。築城繕塞。因河爲界。唐張仁愿復于河北築三受降城。卽國初東勝衛及東西受降城所守地也。後三城內徙。虜遂據套。爲

穴。深山大川。勢顧在彼。而寧夏外險。及南備河。虜得出沒自繇。東西侵掠。守禦煩勞。三秦坐困。故套虜不除。中國之禍。未可量也。臣嘗審度機宜。較量彼我。當秋高馬肥。弓矢勁利。糾合醜類。長驅深入。彼聚而攻。我分而守。此虜利而中國誦之時也。及冬深水枯。分帳散牧。馬無宿藁。日漸羸瘠。比及春深。賊勢益弱。我則淬礪戈矛。備其火器。練兵秣馬。乘便而出。此中國利而虜誦之時也。今禦邊者。不乘虜之誦。而用吾之利。常使得因其利。而制吾之所誦。是以有敗無勝。爲



今之計宜用練卒六萬人。益以山東鎗手二千。多備矢石。每于春夏之交。携五十日之餉。水陸竝進。乘其無備。直擣巢穴。材官騶發。礮火雷激。則虜不能支矣。歲歲爲之。每出益厲。虜勢必折。將遁而出。套之恐後矣。俟其遠去。然後因祖宗之故疆。竝河爲塞。修築墩臺。建置衛所。處分戍卒。講求屯政。以省全陝之轉輸。壯中國之形勢。此中興大烈也。臣願陛下斷自聖心。亟定大計。勅下所司。預理財用。治軍實。比及三年。許臣如前議舉事。先於來年三四月間。陰選

武銳。掩擊鄰近。零虜。以習我軍之技。而倡其勇敢。所謂兵戰而時動。動則威矣。大臣方議築邊。又議復套者。蓋築邊不過數十年計耳。復套則驅斥克殘。臨河作障。乃國家萬年之計。惟陛下裁之。部議築邊復套。兩俱不易。而相較套事尤難。上曰。虜擄河套。爲中國患久矣。連歲關陝。橫被荼毒。朕宵旰念之。今銑能倡逐虜復套之謀。厥猷甚壯。本兵久之始覆。迄無定見。何也。其命銑更與諸邊臣。悉心圖議。務求長筭。廿六年六月。總督三邊侍郎曾銑言。延寧大虜壓



全邊略記  
境。修邊之役。尚未畢工。故臣徵調莊浪魯經兵三千。暫住蘭州適中之地。以備應援。乃甘肅總兵仇鸞疏。撫本鎮兵寡。故違節制。不聽調遣。而巡撫楊博附和。上請并乞責戒。上曰。鸞陝制都撫臣。抗違沮撓。妨誤邊事。本宜重究。念秋妨姑從輕罰。任祿米半年。博亦停俸四月。已兵科都給事中齊譽等言。前宣大總督翁萬達。與山西撫臣孫繼皋謀議不合。已形奏許。今羽檄旁牛。而鸞等復與銑爭持不下。請降旨嚴勅。上是之。命兵書陳經等曰。朝廷設立總督節制。

諸鎮撫總等官。正為假以事權。齊一軍命。孫繼皋首肆沮撓。仇鸞效尤。已各加譴。未竟厥罪。部議依違。倒置不合事體。不允行。十一月。曾銑疏陳邊務十八事。曰。恢復河套。曰。修築邊垣。曰。選擇將材。曰。選練將士。曰。買補馬騾。曰。進兵機宜。曰。轉運糧餉。曰。申明賞罰。曰。兼備舟車。曰。多備火器。曰。招降用間。曰。審度時勢。曰。防守河套。曰。營田儲餉。曰。明職守。曰。息訛言。曰。寬文法。曰。處孳畜。奏下兵部覆言。銑經略甚詳。但事體重大。請下其章于廷臣。各疏所見。然後集議。上



日虜據河套爲國家患朕軫念宵旰有年矣念無任  
事之臣今銑前後所上方略卿等既看詳即會衆協  
忠定策以聞已而銑復上營陣圖入日立營總圖日  
遇虜駐戰圖日選鋒車戰圖日騎兵逐陣圖日步兵  
博戰圖日行營進攻圖日變營長驅圖日獲功夜兵  
圖。上覽而嘉之令廷臣一併議奏時上征代志  
強套中散弱銑自感知遇知無不爲偉然長城之望  
而大學士言夏力主其策同閣之妬起乃陰中之謂  
銑結交近侍妄起釁邊逮銑言駢棄于市識者寃之

嗚呼時乎時乎不再來矣三十二年正月總督都王  
以旂上言三邊皆當虜衝恒患兵寡今復抽選入衛  
邊塞益虛乞量行裁免止令延綏兵萬二千分番入  
衛寧固甘肅兵各一枝以次踐更仍預飭山西鎮巡  
官厲兵二枝各三千人一遇延寧有警聽臣調遣兵  
部言全陝四鎮連歲徵兵七枝入衛今徵不過四枝  
不宜再減以弱畿輔其請山西厲兵候調者如議  
詔可巡撫張珩上言復閱全陝地形保安縣西河川  
有石門鎮石門子甘泉縣北有野猪碛延川縣南有



禪梯嶺俱虜入路。比他獨重。宜各築一城。至防秋日。調遊兵一枝。整步兵三千。分發石門鎮石門子。以待寧塞靖邊之寇。若虜繇鎮靖威武清平入。則石門二處所伏兵。止六十里。可馳至猪硤禪梯擊之。又鄜州爲南下省城。諸路要衝。中有金鎖關。亦宜相形築城。每秋防命一都指揮提卒千人守之。八月陝西兵出。搗虜巢于牛兒營。斬首一百一十六級。獲馬三百匹。套虜駐鄜延半月餘。延慶諸州縣爲所屠掠。且徧乃移營中部。以矚一原。關中大震。會霖雨連月。夜虜乃

繇安塞保安趨把都河遁。初虜數萬屯寧夏山後。先遣精騎五百餘出掠紅井。大帥姜應熊等戒將士固守紅井。以綴虜師。而密遣兵繞出虜後。薄其營。虜大驚亂。我兵斬首一百四十級。詔陞總督賈應春。巡撫王夢弼。總兵姜應熊等。三十四年。巡撫王翰疏曰。延綏鎮舊設軍六萬六千餘名。今止五萬餘名。馬二萬九千餘匹。今止一萬三千餘匹。歲用五十六萬有奇。計浮費不下一十四萬。寧夏鎮舊設軍四萬四千餘名。今止二萬八千餘名。馬一萬四千餘匹。今止一



萬二千餘匹。歲用四十一萬有奇。計浮費不下十萬。甘肅鎮舊設軍四萬五千餘名。今止三萬五千餘名。馬二萬七千餘匹。今止一萬八千餘匹。歲用四十一萬有奇。固原鎮舊設軍七萬九千餘名。今止一萬一千餘名。馬三萬五千餘匹。今止八千餘匹。歲用三十四萬有奇。計浮費各不下一十六萬。求其增費之源。與耗散之弊。約有五端。藩祿歲增。借移軍餉。一也。兵荒多故。常稅屢蠲。二也。舊米賤折輕。今米貴折重。三也。舊邊兵畫地而守。相機而戰。今按伏調遣。行糧加

增。四也。召募無定數。陞賞多冗員。五也。至於逃亡倒失。隴臆濫支。此冒破積習之弊。逋負浸沒。因緣爲奸。此徵解積習之弊。報警則以小爲大。出師則以少爲多。地理遠近。日期後先。或可緩先發。或應掣故留。此征調積習之弊。使車賓旅實繁。有徒供給。餽遺冒支。儲胥此支。放積習之弊。夫額外之費。旣以日增。法外之姦。從而日蠹。卽竭內地之財。以供邊。愈加而愈不足矣。四十一年五月。延綏巡撫孫慎。檄遊擊高廷相督兵築三岔川堡。是時歲饑。工興多流民。應僦就食。



者則相與掠田間蔬菜食之。廷相以嚴急失衆心。及是副總張琮刑治掠蔬者。諸軍乘之大譟。廷相懼。單騎走琮。與遊擊時達。范國輔。陳力等。悉奔避。諸亂入城。肆劫商店。城中大擾。都司謝朝恩。中軍周池。指揮葉采等。各率衆捕擊。擒斬數十人。餘衆始奔潰。榆卒素馴飭。初因前帥李輔與撫董威有隙。縱諸軍詈辱。威隱忍不能制。比南京有振武之變。榆卒遂漸獷悍。給糧督工。稍違其意。卽肆流言。于時巡撫孫慎。總兵孫勇皆庸。不能馭卒。致煽亂事聞。詔勇等逮問。四

十二年。延帥趙奇。布李希靖。繇神木出于半坡山。布吳花繇。定邊出于苜麥湖。各搗巢。得首虜百十有九。四十年。虜數十騎。突入延綏。黃關城。焚掠城外。凡四日。攻堡不克而去。虜之初至也。以數騎漢服扣關。詐稱大同鎮公役。至者闔人啓扉。千衆奄至。把總高尚鈞。中流矢死。九月。虜犯延綏。鎮靖堡。中路叅將魯聽率指揮權世爵。千戶李朝鸞等。引兵禦之。俱敗死。虜乃縱騎圍總兵郭江于魚山峒。趙奇于黃家梁。凡四日。會副總兵李印。叅將謝朝恩等。各路兵至。虜乃解。



去四十五年七月丙辰。虜萬餘繇延綏平山墩入寇。總兵郭琥屯兵清平堡。以虜衆不敢進。虜分其衆爲二。一奔保安定安安塞等縣。一徑抵延安府關外。與固原總兵郭江副總兵時鑾等兵遇。江堅壁不戰。巡撫陳其學度虜已深入。遣都司馮時泰等出邊搗其巢。陷沒虜大掠數日而去。八月虜衆繇平山墩入寇。延安十月丁卯。套虜擁衆繇定邊營。輒井堡入寇。固原總兵郭江帥千總李大本等禦之。遇虜于暗門。兵敗俱死。陝西副總兵時鑾引兵至瓦棧梁。爲虜所執。

失亡士馬幾盡。虜自偏頭關入寇。掠寺塢等堡。殺守備左保及官軍甚衆。上旌江而褫其學等。隆慶二年。總督王崇古條議。一延綏寧夏甘肅陝西四巡撫。往時止令糾察將領。不預戰陣。故不給旗牌。今已指揮諸將統領標兵。宜更撰勅諭。如山西宣大及江南用兵例。各頒旗牌。令得軍法從事。一延綏土軍買馬。勾補科索。不勝其困。以致邊戶逃徙。宜令各守巡道督。延慶清軍官。查覈戶丁田銀。定爲則例。糧二十石。丁更多者。令買一馬。馬死輒補。不得踰時。其次二年而



全邊略記  
買補。又其次三年而買補。糧十石及五丁以下。免其買馬。止應軍役。歲徵軍裝五錢。一請久住邊將。以定將選。一請給入衛馬價。以恤邊累。一請優恤入衛兵馬。勿令修邊。以備戰守。一請量留延綏入衛兵馬。以固重鎮。一請選操守。以固邊堡。一請詳勘覆。以信賞罰。一請寬文法。以勵臣節。四年王崇古疏曰。各邊增費。大都在薊十七。在宣大遼山西十二。而陝獨延綏。因選兵入衛。稍增十一。其甘寧固。歲額京運。視嘉靖初。非惟未增。抑尚多減。今甘肅五萬一千有奇。寧夏

四萬五千。固原九萬。延綏二十九萬七千有奇。通計四鎮。歲額止當薊之半。陝三邊。東自延綏。黃甫川。西抵甘肅嘉峪關。西南抵洮岷。遠接四川松茂。延長數千里。總計兵二十餘萬。馬十餘萬匹。分守紆遠。無所不到。南番北虜。四時戒備。一歲芻糧數百萬計。京軍之外。皆取足民屯鹽糧。視他鎮半。請帑賜者不同。今不宜減削。以重苦之也。又邊腹之費。惟軍職冗濫。尤甚。軍不加多。而官增數倍。俸增鉅萬。一官之俸。數軍之糧也。故各邊軍有逃亡。而糧無附餘者。冗官食之。



也。五年五月總督王之誥言陝西苑馬寺牧地舊惟熟地一萬六千頃養馬一萬二千匹。邇年牧卒間占幾八萬而所養兒騾馬僅七千地彌加而所養馬少。奈何以此資豪猾不以佐國家之費。請視遼東苑馬寺例量酌荒熟地三萬頃養馬一萬匹餘地五萬頃。分別徵銀收解固原以充軍餉。抵減歲例京運從之。六月甲辰總督戴才奏報套虜吉能封貢事宜言東西虜各爲雄長授職宜均。其進貢夷使一百五十名馬五百匹應貢御馬三十匹。派有定數。卽令隨附俺

答一路爲便。惟是互市之說在陝西係重鎮。旣不可招之內地以貽禍階。而甘肅番回開市已久。又不當挾強虜混入延寧。雖號爲近虜。然法紀頗嚴。絕無以寸帛私通者。有如引之入市。反啓釁端。故互市可行之宣大而不可行之陝西。無已則宣諭吉能令與部落各赴大同互市。是亦羈縻之術。兵部以才恃兩端宜行再議。上曰戴才受三邊重任套虜應否互市當有定議。顧支吾推諉。豈大臣謀國之忠。姑不究其令從實以聞。授官通貢如擬。戴才又奏虜吉能款乞



進馬二百匹。比宣大例于延寧二鎮互市。兵部言往者北虜入貢各部落共貢馬五百匹。今吉能所請與前異。效順之始未宜據絕。請破例許之。戒以來年同俺荅入貢一如初約。報可。六年戶部奏延寧甘固自虜款以來所省費凡十四萬。請賚在事諸臣以示勸。上命賜總督戴才及銀幣有差萬曆元年先是虜窺隙入定邊營。總帥時鑾偶飲大醉。禦之敗績。爲虜生縛之而去。頃之吉能病將死。以鑾屬其子把都兒。都兒爲套酋長。在河西之日久。刺嘔諸族往往陰附

之。至是隱布

吉能四子

執鑾以獻。而威正銀定諸酋相率

待命邊外。有旨加把都兒忠義。勞以織金紵絲二

其餘各界之絹棉。二年階州木竹坪番賊執守備范廷武。後乃贖以馬牛羊及段布諸物。以故番益驕橫。弗可制。乃復擊三岔花觜。殺略居人崔應新等而去。塞上恐虜與番合。乃薄責順義王急。是時虜騎每一至關右。輒咎宣大。且命俺荅禁諭之。上詔主計者謂邊臣依違觀望。無事則陰享其利。有事則諉罪于人。豈人臣愛職之忠任。且操縱之權當在中國。今遇



倣卽令俺答禁諭。是倒持太阿。反使虜酋得挾以自重。亦豈當時許貢初意。居無何。卜失兔偕隱布等市榆林口如故。延綏所市馬牛羊。可八千一百九十有七。金可二千。虜自嘉靖庚戌間入石州。染痘病。歲加傳症。至是打兒漢吉能等相繼物故。而土昧阿不害。打兒漢之長子嗣之。酋職咸得嗣封焉。二山峒峪番干哈族。出掠木竹坪。守備范延武爲所給擄。河州將陳堂。洮州將劉世英。互相誘。而番益肆。在階文者名武都羌。在洮者名吐谷渾羌。大禹分北三苗之遺種也。國初

階番阿木族習清淨禪。受封百戶。至諸番浸浸疆大。有詔勦治。三年四月。兵備劉伯燮。糾蘭州將徐勳。集師搗下沙麻等族。乘夜撲殺。斬級數十。而陳堂懷舊隙。又乏功。因先班師。番乃復圍我帥。朱憲史經罵賊而殞。巡撫陳瑞以洮事聞。石星謀。今階州守備帥范詳。撫之。山峒峪粟子莊等族。來置之番廠。猶入市掠殺人。總兵孫國臣率固原驍將而進。文縣守備馬繩武從間道入二王家山。大破其巢。斬首二百二十三級。回兵洮州。巡撫董堯封畫方略。孫國臣以叅將董



大衆遊擊李東暘。陳守義誓師于秀石關。出西南者。入失刺族。叅多族。出西者。入劄將族。大帥獨劄巴舍。族山頂。斬捕百四十級。番敗。負山稜而陣。我軍馳之。番願領白旗者七十一族人。歲納糧二石于階倉。七年八月。順義王俺答從西寧返其巢。於是御史趙楫。奏虜居西海中。盤牙連歲。有四可慮者。撤叅政李汶。備于安遠。察使張九一。備于石夾行。太僕馬圖。備于石浪。兵使石棍。備于岔口。制府郅光先。亦獨軍于蘭州。居無何。俺答已從大同寬溝入鎮。羗境而去。所過

無擾。九年。卜失兒貢期不至。往者宣大授合慶等九十餘人。寧夏授苦的大等七人。各有秩。套長卜失兒。心忿不平。乃同松山等夷四十四人。乞勅乞賞。延撫梅友松曉譬之。曰。爾必欲益欵。其如爾世父俺答之獻丘富趙全。爾大父吉能之獻馬天祿。爾父把都兒之獻時鑾。然後得允。請夷聞之。變色。莊禿賴以索賞。故聚兵二千。欲犯神木堡。友松使使者責之。卜酋對曰。吾祖吉能與順義王青把都。鼎足爲三。今宣大甚厚。而延綏獨薄。是以未服。梅友松以爲延綏馬價賞



資。歲不滿二萬金。不足以當雲中上谷二大酋之費。第不得不嚴拒之。况卜酋爲一套之長。而切盡終受節制。比年切盡馬先卜入。諸部夷皆譙讓之。今卜失兔雖不至。而又無叛貢破市之言。輒命切盡馬獨先入。必至扼腕難堪矣。於是下令十一月赴紅山市。十年十月。紅山之市也。哈漢秃退。適以痘歿。妄疑市上中藥酒。不知高古城攢刀之誓。自背之也。圪塔哈漢之子阿計。秃退之子約秋高。大會塞上。移帳大畛畦。又遷牛灘。請襲圪阿二酋。秩許之。卜失兔陰佐謀。又乞進香五

臺山不許。益鞅鞅鼓行而西。從聚栢林堡。聲欲入榆林塞。十三年。莊秃賴犯永興堡。插罕生獲備守。高武執而僇之。酋長卜失兔請論如夷法。蓋以人命九九充肉袒也。其秋復從永興丘家梁大鹵。守戎文登雲麻濟邦。陳光祖引兵遮鈞雲之道。叅將陳愚周徐仁威等兵皆集。射中插罕。執之。射死賽汗恰二人。延撫梅友松怒。布算搗其巢。莊酋懼乞哀。總戎賈國忠謝絕之。以爲前年許莊秃賴于孤山木瓜清水黃甫四堡。予賞各十一分。歲費一百九十金。今增索四十分。



其如諸酋何。于是明愛母切盡罕同。到邊爲之解。總  
戎臧大歡。指此相濟爲惡者。當並治。切盡大驚。甘請  
罰。總督郅光先許之。攢刀而市。並釋插罕歸。十四年  
九月。伯言把都集衆入塞攻鎮夷堡。我關禦之。三晝  
夜不解甲。虜大敗去。伯言把都慟曰。阿父怨終不可  
報矣。十五年。莊酋入酒泉攻李家堡。意略生番咎咂  
族。奮戰得利。莊酋把忿益反。掠我小溝堡。將軍魯光  
祖邀其歸路。至廟溝。干弩俱發。斬虜百餘級。乃遁乞  
降。總督鄭洛許卜酋罰馬以贖。復不悛。執我裨將楊

桂爲質。入犯鎮番。我師擊破之。宵遁。諸貢虜惟切盡  
吉能最服漢義。是年死。其妻妣吉赴市如初。六月卜  
酋終不馴化。乃聚酋寇邊。先闖甘肅蔡旗。越黑山趨  
水泉。我兵斬首九十餘級。詔曰。鄭洛功可加也。大  
帥張臣深惡卜酋反覆。疾力戰于朱莊。幾中鳴鏑。吉  
囊卜失兔亦中流矢走。我帥生獲卜酋愛女。傳檻車  
斬捕八十餘級。奪輜重亡算。酋母太虎罕同託宰僧  
乞恩以伏罪。于狼灣。遂同阿只兔還榆林邊外。總督  
郅光先兵備石櫃。遣通事白鬧兒曉譬火酋。諭以禍



福母鈔洮河。總兵劉承嗣遣千戶李福保等與俱從。鎮海堡出邊。道逢思哥密生番板的等。執而殺之。光先大恚怒。以爲欵塞以來。所不見者。具狀請。此癸未時南番捕我官軍。法議往正其罪。而李福保等。則有宣大通官揚亮例可比。于是議贈福保勳階。以勸死事者。火酋亦往往不赴反言約。而以收生番爲務。已得刺卜兒之衆千餘。都御史魏時應慮之。曰。寇不東還。故巢而番虜勢合。羽翼已成。可爲岌岌。其秋火酋欲收紅番祁李二氏。二氏最慄悍不從。撫院曹子登

申戒紅番。其堅志勿搖。敢從邪者。發洮河莊浪兵征之。有頃。紅番又爾加等引諸虜奪祁家西番。略人畜亡計。叅將陳治剛提逐之。虜乃走。援兵四至。奪其帽襖。撒袋而還。有刺卜兒者。盜火酋馬肥。遊擊王鐵塊利其肥。攘之生怨。復引火酋寇焉。十七年八月。扯力克與火落赤大寇洮河。總督梅友松遣通事陳有馳檄三娘子。勿佐扯力克。以迎佛爲名。而陰收賓兔諸都也。扯酋猶豫不欲歸者久之。給諫徐垣議曰。三娘子言不見德。其有離心。莫若乘是時陰欵三娘子。



而立其愛子不他失禮。悉分封諸酋。如五單于故事。厥黨可携也。十八年。扯酋乃出鎮羌而還故巢。火酋志在洮河。擁衆馳歸德所。采木萬餘。以卜寺工。總督梅友松。巡撫趙可懷。會議曰。洮河之虜。自丙兔及克臭。逐牧蟒刺川。歲引不絕。遂成虜穴。今火酋復據。工勢將滋蔓。決策募番兵。阿力族桑節者。所生十三子。虜滅其二部。兵萬餘。誓以死報。故收番爲上策也。御史萬國欽。劾奏庸駑之介冑。以邊方爲捷徑。日浚其甲士之衣糧。以媚首輔。時行申歲以十數萬。無事。

則爲之援引。失事則代之蔽護。邊臣邊將。多出入其家人。宋九之門。恣爲欺誤。虜再入塞。破關殺將。督撫疏稱。閣臣指授方略。不知是何方略也。時行對陛下稱。堅壁清野。爲萬全策。而劉承嗣之覆沒。是衝壁而入也。臨鞏搶掠一空。是殺人盈野也。堅清之言。何以解矣。兵科張棟言。經略鄭洛。題稱總兵劉承嗣。所報鎮兵十九營。計三萬七千九百。而堪戰之數。止千六千。何陵夷至此也。閱事之臣。三年一遣。謂以八事殿最邊吏。八事修者與斬虜同功。八事廢者與失機。



全通略言  
同罪。乃二十年來。凡五六遣。率以一疏了之。覽其疏中。何嘗不曰。將良卒勇。士飽馬騰乎。虜至輒稱一切無有。所閱安在。十九年。他卜囊。率火落赤數萬。殺略益甚。大寇洮河。上切責大司馬曰。虜衆渝盟。犯順弛備。乖方。其覈始事部落。及失機信地。以聞。御史周孔教等。追論郃光先。李廷儀。趙可懷。錢楷。李丁等。奪治有差。御史崔景榮疏曰。瓦刺他卜囊。卽永邵卜之別名。詭爲姓號。犯我西寧。而懦將捧頭鼠竄。縱橫海上數歲。咸喪氣不敢問。復移捏三川。翼火酋而佐扯

酋。挾邀我賞也。且李魁。卬未幾。而李聯芳繼之。李芳又繼之。邊吏之愆滋大。而李廷儀又辯其訛曰。虜王奉詔西牧。非私行也。有竊卽罰。非亡當也。今將卒失在窮追。奈何咎于俺答故事。二十二年。葉夢熊檄總兵劉承嗣。大治堤。決水浸城。虜卜失兔。遣酋犯花馬池。麻貴董一元。擊敗之。虜遂引去。二十四年。虜緣戮酋長之釁。兩秋大舉。巡撫李春光。調將士出塞。捕斬四百有奇。按臣于永清核其事。得予陞蔭。三十五年。按臣余懋衡。報閱視之命。曰。延主客二十二萬六千



有奇。今實八萬九千有奇。原于民屯之逋。鹽商之困。京運之愆。沿邊夾道。二十餘里。地非不毛。而屯事困曠者。勸相不勤。科索未禁。催征太苛也。鹽法不能給邊者。則開墾宜復。奸賄宜譏。中例宜融。浮引宜革也。總督徐三畏。探虜之情。秀賴卜失兔。尚趨起于榆塞。銀定反成。猶鴟張于賀蘭。火酋盤踞于湟中。吉囊分伺于西河。未敢安枕臥也。請移花馬池以須。三十七年。巡按楊一桂曰。臣至平陽。卽聞陝西徇賊數百。踏水龍門。掠河泮。太平。稷山。卿寧。四縣。兩年而三被之。

臣至安邑。又聞徇賊由潼關。掠芮城。平陸。夏縣。亦三被之。又真寧縣報去歲紅山嶺之變。徇賊肆掠涇。鄜。靈。台中部。宜君。至八百餘人。前撫顧其志。用兵而后散。然終未歸于農。近日來。新舍獲于真寧。李云兒。劫于郃陽。田新。出沒于盤屋。詢其故。父老皆曰。招安誤之也。洮岷道蘆侍元。主之。慶陽同知潘應。相從之。法宜斥。四十一年八月。綏帥官秉忠。禦虜于保寧。捕斬二十四級。而套虜猛克什力。旗牌撤勒等。恃兄弟衆。索賞于響水。波羅。東路沙計。又欲增入其賞。特整兵



于常樂雙山。建安高家防之。白慎修王國安等。各扼  
要以待。四十三年九月。虜犯大栢油堡。副將孫弘謨  
禦之。斬十五級于波羅。把總王化白光先亡于陣。弘  
謨趣田家山而軍。虜圍合營。大圪塔生縛弘謨去。遊  
擊萬化孚赴圍。虜解而遯。巡按龍遇奇効東路失事  
狀。四十四年八月。吉能誘犯高家堡都司王國安。見  
其零竊易之。單騎五人馳出。亂沙中伏發被害。綏撫  
金忠士以報。四十五年。兵科趙興邦論陝西套虜。新  
舊互市。一歲兩行。金繒之費。以八萬計。七年之間。所

費幾六十萬。每年以二十萬爲芻餉之費。則士飽馬  
肥。卽長驅虜廷可也。不宜示弱至此。巡按金忠士奏。  
邊將失守之律重。邊將之權。反爲虜操。若曰我一犯  
搶。爾罪立至。故邊將往往啗虜以重利。使之或東或  
西。而不出于所轄之地。常嫁禍于鄰。願寬其文法。以  
責成之。兵科熊明遇以爲捷功太侈也。疏曰。延綏鎮  
自去秋套虜大入之後。官軍數出塞。據督撫鎮劉敏  
寬馬從聘官秉忠杜文煥所報功次揭帖。如官秉忠  
張榜等。委草澗戰斬首九十五級。白兆慶孫啓祥等。



沙梁之戰。斬首七十七級。萬化孚趙克先龍池之戰。斬首二十一級。張榜王國安。王學詩等。西江山之戰。斬首百二十級。蕭捷杜文煥祈繼祖等。定邊沙泮之戰。斬首二百四十八級。杜松等。寧塞棗次梁之戰。斬首二百一十五級。白兆慶官秉忠王捷等大畛哇之戰。斬首百一十六級。柳汝植等。窰兒灣黑河子之戰。斬首三十七級。王國安劉更化等。小畛哇之戰。斬首三十二級。蕭捷李榮候世祿等。明水湖之戰。斬首二百三十八級。李滿倉陳維翰等。三營河之戰。斬首七

十七級。柳汝植白綱等。總管之戰。斬首四十二級。杜文煥等。安邊保寧長樂之戰。斬首三百五級。其他零捷如李鳴鳳响水之八級。張波羅之六級。孫朝用神字墩之四級。李茂先王國安雷家塢之六級。萬化孚神字墩之十四級。喬鎮繼柴家溝之七級。郭繼藩黃艸之二級。蕭捷安邊之八級。杜松靖邊之七級。王學匹瓦菴之十級。孫啓祥等。波羅之八級。大約不下二千矣。夫諸將啣王化白光先孫弘謨之憤。矯弓累弦。勵劔負戟。以深入爲事。捷音絡驛。凱歌成韻。豈不庶



幾乎除克雪恥。明漢兵若雷風乎。而道路悠悠之論。頗有不然。功令以百二十級爲大捷。通計功次可二千。可當十五大捷之數。督撫鎮升蔭。如宮保如尚書。左右司馬。應各進十五人。錦衣延世之賞。伏各各稱。是其偏禪以下之升賚。與賞功銀十萬不與焉。倘異日有橫桃強胡。爲國家生事于夷狄者。必執此爲口實矣。四十六年四月。猛克什力台吉蓋名。乞降者三年于茲。十三日同母妻子女五十三人。從嚮水堡邊墩投降內屬。其撥置于吉能朋比于沙國。部落有脫

輓之虞。兄弟有閭墻之變。骨肉已離。獨夫難保。延撫董國光合總督楊應聘曰。彼亡一屠耆。而樹一勁敵。我得一都尉。又消一外憂。相應假以守備。稍示優崇。令其立功異域。觀其順逆焉可也。泰昌元年十一月。都御史張問達侍郎盛以弘。張經世等。以陝人爲陝語曰。頃有虜以六七萬奄抵郡城。攻圍五日夜。危險一間耳。撫臣張之厚。道臣張爾基。宋槃。郡守王國瑚。先事戒嚴。護堵備至。推官胡養度。率衛弁孫弘。葉蕭。偉等。伏城下。殺射其頭目。僉書葉捷。睹出家丁擊襲



全邊略言  
之城保如故。而所過縣驛村社。流毒無寸土矣。五衛班軍。雖赴榆林。總成羸卒。莫若折一衛之備。抽解延安。而四衛選壯更番。則餉自無而之有也。府城百八十里。有茅嶺關。深溝萬仞。舊堡猶遺。虜自鎮靜出。必繇此矣。洛川黃龍山。徇夷不足控也。移駐于茅關者。爲最。天啓元年。御史高推具彈文。張之厚欺也。杜文煥懦也。火至延安城下。衛弁岳喬梓被斃。全軍盡覆矣。潘雲翼郭允厚。皆謂釀百年之禍。二年九月。套虜覘調遼之虛也。犯合水環縣慶陽固原。而圍延安城。

者。凡三日。杜文煥堵之解去。先是八月。則馳施膚甘泉延安諸縣。焚掠多矣。虜貽謾書責曰。斬而文煥。吾兵乃撤。兵科蔡思充詳看章奏。以爲大將之去。畱夷虜操之。如國體何。火落赤卜言。太干兒罵。代爲吉能。講款以爲去秋。曾許銀馬。必得爲例。巡撫奈自強曰。折諭良難也。四年二月。延撫孫居相奏黜虜。卽亡賴。然一盟不改。無如劣弁自分畛域。授之隙萌。如延第約以勿犯三榆。甘第約以勿犯五涼。寧第約以勿犯松山已耳。虜習于計。此貢彼鈔。推于未同之詛誓。何



不飭各邊臣申大一統之義。共期保塞。母私囑以敗  
款也。夫掩殺襲取之禁。銷其怒心。正正堂堂。戰勝攻  
取。不亦可乎。海虜火酋諸子。惟廣台吉。乞慶台吉。爲  
最強。因公妾故。居河西者。與河南互嫌。而其兄揣庫  
兒。居間爲好言。非中國之利也。已遣屬李惟達。苑攀  
龍。厚結番僧。多方行間。紅酋之折橋。乞酋之劫馬。閱  
于墻矣。六年十一月。綏撫張朴。以爲撫賞私增之宜  
杜也。原市而外。各堡私增虜賞。名曰轉賞。其額渝。其  
期失。初乞舖餽。侵假布貨。又侵假而易以白金。已增

數十。反借我以興戎。近者干酋跳梁無忌。乃有漢音  
何門子。爲之翕合。訪其詐狡。縛之藁街。還我人畜。赦  
以不死。于是私簿繳銷。始就戎索。大約私賞之弊。起  
于添設操守。幅員旣褊小。而干掇悉單匱。母如三路  
十營。盡革之便。七年五月。總兵楊肇基曰。延綏邊長  
一千二百餘里。鎮城所居適中。至黃甫路。六百里。西  
抵花馬地界。七百里。邊外住牧。不下十萬。若一面有  
警。往返應援。亦須十數日。已是鞭長不及馬腹。若東  
西齊警。彼此兩失。封疆重任。罪將誰諉。焉敢顧分權



全邊略言  
之小嫌。忘報國之大義。無如照花馬池新例。于西協  
地方。亦設一有望大將。分界防勦。一面有事。則合力  
拒勦。東西有事。則各分專敵。如此爲善。撫臣宋槃。請  
起舊帥孫顯祖充之。

職方氏論曰。明興虜。駘瀚表。邊網疎闊。延綏之間。比  
于漢朔方。唐受降城。風磧弗驚。利衍原隰。成化以來。  
創榆林。弘治以還。制固原。疇昔之內邊。今時之劇障  
矣。米脂魚河。幾三百里。據于襟吭。湮谷塹山。夾道廣  
窵。耕樵蒐苗。豈非萬世豐大之業。乃文布政貴之改

西延慶之稅折也。馮侍郎清之改本色而盡折之也。  
何異葉畿擅變開中之法。坐窳其本源。榆林四望黃  
沙。五穀不產。貨賄不通。主餉客資。全仰腹裏。倪尚書  
岳許尚書論。轉漕至計。圖之其時。黃河自陝州而上。  
抵綏德近境。春漲則河渭悉通。沿封而水陸遞輓。復  
設廩庾于適中之地。例外鹽貲。儲糴待稽。士無饑色。  
敵乃可滅。經史所臚鑿鑿也。夫修邊搜套。敬而慎之。  
然以世廟之英姿。嘉與夏言曾銑之權策。爾者胡  
孽竄套。猶雛也。忠謀陷于妬戮。傑將灰心。物力亦殫。



勇敢勞于徵發。而駱駝城之雄氣。不無耗衰。夫固原者。所以肘臂榆林。唇齒寧夏。使能專備靖虜一面。當日火篩。何自蹂內哉。蘭靖安會。初非充斥地。而賀蘭山後之胡騎。每視冰合。而跨蹕遂自如也。花馬池為門戶。王公瓊移鹽批于下馬房者。良在乎來旅實也。總制總戎。或移駐或徙之。議多則政愈輟。食分則吏愈蠹。安邊定邊之衝。責誠在節度大臣矣。天啓之季。綏餉告缺。三十有九月。典胄何卒歲。邊人嚙指而寒其心者。胥然矣。

何

卷之四 終

西



